

Bunas notas per il nov program

Sesida dal cussegl dal public da RTR

■ (cp) Il cussegl dal public ha discutà en sia ultima sesida las emissiuns dals Cuntrasts dal schaner 2012. Quest onn observa il cussegl en spezial questas emissiuns. Per ils Cuntrasts dal schaner retschaivan ils responsabels da Radiotelevisiun Svizra Rumantscha bunas notas. Il cussegl dal public ha er discutà extendidamain il nov program dal Radio Rumantsch (RR). Mintga dumengia saira a las 17.25 vegni mussà sin SF1 l'emprima giada ils Cuntrasts. La gruppa da lavur dal cussegl dal public valitescha las quatter emissiuns dal schaner 2012 sco interessantas. Remartgà han ins che mo la Surselva era resguardada. Reportaschas davart personalitads persvadan il pli fitg. Las istorgias dattan invistas interessantas. In temp d'emissiun pli lung vegniss giavischà per pudair approffundar las istorgias.

Sper films monotematics emetta la Televisiun Rumantscha era magazins curts. Il magazin dals 29 da schaner ha tematisà la fusiun «Glion+». La furma d'intervista ha provocà ina discussiun animada e diversas vuschs criticas en il cussegl dal public. La moderatura haja interrut memia savens il partenari d'intervista senza raschun. Il ciclus d'emis-

siun dals magazins n'è betg determinà cleramain. Uschia na sa l'aspectatura u l'aspectatur betg s'orientar cura ch'i vegnan emessas contribuziuns en questa furma. Ils magazins sez porschan la pussaivladad da tractar temas che fissan memia lungs per in film monotematic da 25 minutas.

Radiotelevisiun Svizra Rumantscha ha midà la moderaziun per ils Cuntrasts. Per monotemas na fa ella nagina introduziun moderada. Quai pretenda d'ina vart ch'il cumenzament dal film tschiffia l'aspectatur, da l'autra vart er che la tensiun vegnia mantegnida. Senza questa moderaziun sto l'aspectatur sez chattar il fil en la tematica.

Plinavant ha il cussegl dal public fatg in'emprima discussiun davart il nov program dal Radio Rumantsch. Ils responsabels da RTR han survegni in emprim feedback ord vista da l'auditor. Il cussegl recepescha il nov program da radio sco pli viv e pli adattà per l'auditor.

La proxima sesida dal cussegl dal public, ils 4 d'avrigl, tracta las emissiuns da Cuntrasts dal favrer e dal mars 2012. En pli prepara ina gruppa da lavur in emprim rapport davart la midada dal program Radio Rumantsch.